

## 晉書·扶南國傳

扶南西去林邑三千餘里，在海大灣中，其境廣袤三千里，有城邑宮室。人皆醜黑拳髮，裸身跣行。性質直，不爲寇盜，以耕種爲務，一歲種，三歲穫。又好雕文刻鏤，食器多以銀爲之，貢賦以金銀珠香。亦有書記府庫，文字有類於胡。喪葬婚姻略同林邑。

其王本是女子，字葉柳。時有外國人混潰者，先事神，夢神賜之弓，又教載舶入海。混潰旦詣神祠，得弓，遂隨賈人汎海至扶南外邑。葉柳率衆禦之，混潰舉弓，葉柳懼，遂降之。於是混潰納以爲妻，而據其國。後胤衰微，子孫不紹，其將范尋復世王扶南矣。

武帝泰始初，遣使貢獻。太康中，又頻來，穆帝升平初，復有竺旃檀稱王，遣使貢馴象。帝以殊方異獸，恐爲人患，詔還之。

[（唐）房玄齡等《晉書》卷九七·  
列傳六七·四夷·扶南國傳]

## 南齊書·扶南

扶南國，在日南之南大海西蠻[灣]中，廣袤三千餘里，有大江水西流入海。其先有女人爲王，名柳葉。又有激國人混填，夢神賜弓一張，教乘舶入海。混填晨起於神廟樹下得弓，即乘舶向扶南。柳葉見舶，率衆欲禦之。混填舉弓遙射，貫船一面通中人。柳葉怖，遂降。混填娶以爲妻。惡其裸露形體，及疊布貫其首。遂治其國。子孫相傳。

至王槃況死，國人立其大將范師蔓。蔓病，姊子旃慕[篡]立，殺蔓子金生。十餘年，蔓少子長襲殺旃，以刀鑿旃腹曰：“汝昔殺我兄，今爲父兄報汝。”旃大將范尋又殺長，國人立以爲王，是吳、晉時也。晉、宋世通職貢。……

扶南人黠惠知巧，攻略傍邑不賓之民爲奴婢，貨易金銀彩帛。大家男子截錦爲橫幅，女爲貫頭，貧者以布自蔽。鍛金鑲鑽銀食器。伐木起屋，國王居重閣，以林柵爲城。海邊生大箬葉，長八九尺，編其葉以覆屋。人民亦爲閣居。爲船八九丈，廣裁六七尺，頭尾似魚。國王行乘象，婦人亦能乘象。鬥鷄及豨爲樂。無牢獄，有訟者，則以金指鑲若鷄子投沸湯中，令探之，又燒鎖令赤，著手上捧行七步，有罪者手皆焦爛，

無罪者不傷。又令沒水，直者入即不沈，不直者即沈也。有甘蔗、諸蔗、安石榴及橘，多檳榔，鳥獸如中國。人性善，不便戰，常為林邑所侵擊，不得與交州通，故其使罕至。

[（梁）蕭子顯《南齊書》卷五八·  
列傳三九·東南夷·扶南國傳]

## 梁書·海南諸國傳

海南諸國，大抵在交州南及西南大海洲上，相去近者三五千里，遠者二三萬里，其西與西域諸國接。漢元鼎中，遣伏波將軍路博德開百越，置日南郡。其徼外諸國，自武帝以來皆朝貢，後漢桓帝世，大秦、天竺皆由此道遣使貢獻。及吳孫權時，遣宣化從事朱應、中郎康泰通焉。其所經及傳聞，則有百數十國，因立記傳。晉代通中國者蓋少，故不載史官。及宋、齊，至者有十餘國，始為之傳。自梁革運，其奉正朔，脩貢職，航海歲至，逾於前代矣。今採其風俗粗著者，綴為〈海南傳〉云。

[（唐）姚思廉等《梁書》卷五十四·  
列傳四八·諸夷·海南諸國]

扶南國，在日南郡之南，海西大灣中，去日南可七千里，在林邑西南三千餘里。城去海五百里。有大江廣十里，西北流，東入於海。其國輪廣三千餘里，土地溇下而平博，氣候風俗大較與林邑同。出金、銀、銅、錫、沉香、象牙、孔翠、五色鸚鵡。

其南界三千里有頓遜國，在海崎上，地方千里，城去海十里。有五王，並羈屬扶南。頓遜之